

四庫全書

集部

欽定四庫全書

集部

弇州續稿卷十九

詳校官編修_臣潘庭筠

中書_臣劉源溥覆勘

總校官進士_臣楊懋珩

校對官檢討_臣王鍾健

謄錄監生_臣張賦京

欽定四庫全書

牟州續稿卷十九

明 王世貞 撰

詩部

七言律

己丑元日即事

嵩呼初畢捲朝班轉入玄宮松柏間
北憶青陽開左个南瞻紫氣滿鍾山
屠蘇却借宮官榼胃絮聊溫野客顏

卦數已周成底事不如酣卧掩柴關

御花園

危亭藻井鎖芙蓉鎮日烟雲曩自封
奇石翳藤疑伏虎古松撐漢欲成龍
金盤有露懸孤掌玉輦無時下九重
擬向前朝詢舊績白頭中貴好從容

三疊韻答太僕王翁

從肩輿中得之中一韻顛倒不能正也

三楚騷壇獨汝賢五朝流輩讓君先
名緣洗耳逢人說句自從心以後傳
荏苒可忘辭印事依稀垂及杖朝年

恠來百戰難為敵才接前茅已索然

贈李太學

鬚鬢猶鬚眉目疎宛然名下果無虛揮毫處處供人賞
閉戶時時讀父書白下陰何看漸少松陵皮陸近何如
老夫縱酒猶頑健只是無名可借渠

蘇侍御漢傑還自按滇舟過龍江余與太宰楊公
候之不得却寄一首

故人分手惜居諸幸是天南鴈不孤益部使星知久動

江頭仙艤未堪呼碧雞金馬曾題否
洱水昆明可汎無
一自飛章通帝坐至今霜色滿皇都

同鄉楊太宰吾宗少廷尉路戶部沈北部袁叅軍

王司訓會飲趙中貴園亭分韻得風字

貴人樓閣上摩空躡屐携觴事未窮
牆柳似分西禁綠
庭花欲北上陽紅
客從吳苑偏鄉語
詩自延陵辨國風
莫笑老夫豪興發
依依新月鳳城東

徐九公子園亭即事

粉實斜通宛轉廊
壺中山水待長房
輕雲入坐籠朱閣
小雨將歌逗畫梁
客重不虛公子席
花嬌欲施令君香
已教晝漏遲遲報
猶自貪聞子夜長

游徐五公子金盤李故園

戟門垂塌徑微荒
猶詫中山異姓王

堂榜壁聯俱錄
中山王誥語地

遠禽魚偏得性
年深檜枯不成行
沉沉隔塢藏朱舫
宛宛流杯出粉牆
醉撚霜髭還自笑
可堪闌入少年場

坐徐四公子錦衣東園中樓卽事

別起層樓踞露臺諸峯環列似輿臺窻中塔捧金輪出
報恩塔庭中一峯秀輪當窻檻外神驅碣石來偉為諸峯冠茁茁華燈疑夜
日柘枝繁鼓似晴雷主人不作元龍簡下客慚非草賦
才

游徐四公子宅東園山池

侯家樓館勝神仙况爾烟巒四接連平臨絕壑疑無地
忽躡危梯別有天虬洞轉深能瞑晝魚波競皺欲潏淵
支頤政爾耽幽賞無柰笙歌引畫筵

送大宗伯姜翁考績北上

津人伐鼓榜人謳為送仙槎犯女牛報政遠追師尚父
賜車差次富民侯朱顏色奪宮袍曉華髮神凌海鶴秋
倘遇君王問綿蕞可能聊為漢廷留

寄荅邢子愿先生子愿有詩似快已之得歸而尚
有憂讒畏譏之意故云

河朔風流邢子才紫衫拋得似黃埃愛他陶令歸能賦
嗤我何公去復來試看海鷗誰不下但逢秋隼任相猜

欲尋後會知何日珍重清洋醉裏杯

再游鳳臺園

平臺寂寂隱長堤羞聽輿歌及鳳兮
二水三山那在眼病梧衰竹不成棲
艾藤詰曲通新徑洗石摩娑見舊題
翻恨大言唐李白令人疑殺白門西

李臨淮竹園

李侯高館逼雲孤翠竹彌空赤日無
一自六師煩受賕不妨三徑久從蕪
清商似逗黃金縷上客曾誇碧玉壺

喚作長矛三十萬紫薇詩調似官廳

游徐氏莫愁湖故園

翠輦無際歷明眸贏得湖名古莫愁過雨欲移花外徑
斜陽爭漏竹西樓蟠松別主無拘束語鳥驕人有唱酬
長取斷橋三兩柱也堪將繫采蓮舟

贈南陽孔炎王孫

中壘高皇七葉孫一時文米冠諸昆時凭漢閣青藜杖
不讀淮王鴻寶言立壁圖書無長物傳經父子有專門

祇應奇字輸揚叟憑仗雙鴻海外論

戊子秋宣城梅禹金與其從叔季豹相過從頗數
今年春禹金之從弟子馬來出其詩見示更自
斐然於其行得一七言律贈之

雙頰微頰髮尚鴉比它羣從更高華從誇荆地人人玉
不及梅家樹樹花舡底歌聲牛渚月袖中詩草敬亭霞
惟憐樂府新翻調強半春風傍狹邪

寄贈同守王公為族孫泰亨請也

為問吳中賢半刺牙緋新著主恩深春風總是長依憶
暮夜都無可卻金見贈虔刀時出匣親裁召樹已成陰
莫疑門下諸生頌強半酬知一片心

贈故將軍劉忠父

劉生慷慨古來聞豹隱深冥鶴在羣乍見灞陵逢醉尉
不甘南部弄參軍籌邊欲借青油幕倚醉狂書白練裙
莫以鹽車輕病骨膊間猶長五花文

考績至淮聞有大司寇之命便道抵家即事有感

移官賜沐帝恩私展轉翻成觸緒悲
蒿目畏傳鴻鴈句
棘心愁聽鵲鵲詩空矜書錦東歸日
况值宵衣南顧時
八座縱榮那足羨
秋風不貸鬢邊絲

其二

文犀為帶鶴為衣
共託尚書天上歸
華髮鏡中差自狎
故人杯底驟成非
賢昆玉樹枯來久
病婦釵荆長亦微
最悔靖廬三五步
蒲團恰好讓蚬蟪

明卿自楚馳信相問云秋後當訪我金陵以一詩

賀兒駢登第以六詩苦旱答之

楚波如黛瀉潺湲美有雙魚尾更殷中散已申秋後駕
巨卿從破別時顏乍悲雲漢黎民詠忽羨星辰父子班
解道超然無物念人間憂樂也相關

送凌金吾護潞王之國便道歸覲大司馬公還朝
躬隨朱芾之千乘手捧金符下九霄舞綵真娛大司馬
賜冠新挿侍中貂由來禮樂堪元帥別有韜鈴衛聖朝
倘問同時休汝客為言衰朽愛漁樵

過大宗伯徐公留飲山池出所懽明童佐酒

輕搭小舫受涼颼正及東山行樂時楊柳腰新宮傳宅
芙蓉客滿衛軍池朱顏不待冷雲母白苧親調付雪兒
懽劇翻追少年事射陽帆底對彈棋

飲徐公歸有園後旋過乃壻張伯隅園小坐有作
徐邈飛觴故不慳仍過玉潤許舒顏穿池巧博迴環水
構宇能承向背山客至琴樽欣得所坐深花鳥樂相關
與君試問峯頭石若個中丞壓載還

送鄒彥吉學憲移杭嘉兵備使者

離得東山三舍無高牙紅旆擁前途津頭候吏猶鄉語
腰下懸魚是舊符尺檄可能收大海奚囊恰好貯西湖
中朝文武如公少莫訝麒麟著豎儒

奉贈盛原濟國醫

大似顏家少父狂箕裘籍籍有輝光青囊不博書生篚
白帔能分御史牀任是醫和通國脉可煩臣意對師方
生平恠殺兒曹懶擁篲爭先禮藥王

承明卿大叅以詩見賀司寇之遷且訂修真之約
而所托似非其人聊以奉酬且示微風

秋風忽下楚天翰似為浮榮動古權任使白門寬吏傲
却妨丹竈背人寒新春實買鳩夷檝異日虛留司寇冠
莫笑鰕生城旦對由來黃老近申韓

其二

才名饗盡復談玄天下英雄讓爾先老子也知離世網
前身錯解悟真篇馬肝時見文成死鴻寶難容子政傳

曾讀漢時方技傳北邙高塚葬神仙

秋日發黃浦朱氏三子與張長輿顧仲韓擘舟送

別書此紀事

傾城冠蓋擁沙洲雋少將無厭白頭晴日好停黃歇浦
秋風追並李膺舟雕盤欲選俱名味玉塵難揮遇勝流
不是西州有餘慟此行何異五湖游

時弔潘長公歸

丹陽道中承宮保太宗伯姜翁出會因贈一律

宣髮方瞳冰雪顏才聞報政即投閒久叅白下夔龍席

新冠青宮羽翼班榮似二疏辭漢闕高如四皓返商山
莫疑下客多塵思今日叨陪紫氣間

徐大宗伯同唐張婁三子見餞至新洋江始別

新洋江口好停舟淡月籠烟破暝愁君卧可能忘象闕
予行終擬問菟裘嬌歌易作雙青眼別酒難禁兩白頭
揔是秣陵多勝地却慚人喚鳳凰游

過潁墅關李啓鑑司農要張毛錢吳諸名士餞送

分韻得連字

楓橋暝色隱樓船
文彩風流盡此筵
諸友但能河朔飲
使君寧惜水衡錢
已將歸思尋張翰
若箇逃名似魯連
乘興偶然成別語
相期不必衆人傳

九日家忌掩關同年兄袁相國履善以三詩見督
尊酒聊爾倚答

蕭條九日散賓儔
裁及登高淚暗流
揔為蓼莪捐令節
敢將萸菊破牢愁
霜嚴故國無鴻鴈
氣肅高林有鷓鴣
慚愧寓公袁相國
却緣尊酒費詩郵

新樂大王明德懿親肩美齊獻被禮服義趾稱河
間耳順已逾國儲未立邇者熊夢奕奕麟趾振
振允在同聲俱履稱慶敬成七言律以弁卷端
阿監傳呼銀鑰開分明玉樹主君栽渥洼馬出真龍種
東海珠生老蚌胎春暖雪宮添滃鬱地尊青社吐崔巍
即看同姓諸王表琬琰鐫名上帝臺

請告杜門大司成張公少宗伯趙公學士余公携
觴見枉分韻得桑字

病起閒門日自長
晚雲珍樹鬱蒼蒼
騶呵並枉烏衣巷
簪盍聊呼白玉堂
此別孤踪各朝野
只今何事不滄桑
諸賢莫厭飛觴緊
萬折聲中滿路霜

送黃季主先輩

一時三楚汝稱雄
擬學張衡賦故宮
發篋秣陵餘白僕
稱詩江夏有黃童
荷衣間過長千里
蒯鉞時彈幸舍中
後夜便為天際別
大江西望吐晴虹

送謝太常博士謝曾使琉球

金陵握手非初會曾讀芙蓉謝監詩
鰲背尚懸唐使節
螭頭重領漢官儀
星辰午夜親嘗酎
霜露商秋肅侍祠
祖道勸君須盡醉
祇今猶是不齋時

事白後再上疏乞骸承伯玉司馬以二詩慰問有

感問答

紫袖薦陳白髮稀逢人羞說宦情微
羊腸過盡依然險
馬角生來可不歸
谷口行廚徹徹飯
江頭初服芰荷衣
東山司馬如相問
南北風塵有是非

其二

飛章萬里叩天闈，乞得閒身是主恩。
已荷聖朝寬毀骨，可煩詞客為招魂。
行逢車馬心先折，語到漁樵道便尊。
依約十年栖隱處，軟莎新竹護柴門。

臘雪中承御史中丞石公納言徐公廷尉張公京
兆尹陳公鴻臚艾公過訪，陳公有作紀勝漫爾
奉次

城北林深臘意濃，諸賢尊酒且從容。
吳天忽覩黃雲合

鍾嶺俄成白玉封欲問狐裘慚晏子

用晏子春秋對齊景公事

寧勞

鶴氅羨王恭知君郢里裁高倡無邪登徒老更慵

陳京兆玉叔以喜雪詩見投奉和

臘雪千門喜共傳耐它寒色為豐年謝家玉樹詩偏好
王氏烏衣屋乍妍僵卧可煩京兆尹促歸何異剡溪船
恠看兒稚爭收掃曾習農書汜勝篇

贈談叅軍思重

清世何緣有避讐為貪山色秣陵游間從方外稱司馬

懶向田間詫故侯
王謝風流杯底出
秦淮烟月畫中收
官衙不少如澠酒
君但來過緩客愁

用贈談思重叅軍韻再贈謝少連茂才

為厭青藜夜校讎
幡然聊作石城游
時裁小令調廬女
仍草長編傍鄴侯
六季遺踪斑管在
三山秀色錦囊收
勞君問我眉端事
除却歸來不解愁

庚寅元日立春祝聖畢始以紅錦袍謁陵

臘意將歸爆竹催
爭依仙仗集蓬萊
堯樽薦柏條風入

漢省呼嵩瑞靄廻原廟漸傳銀鑰啓祠官新覩錦袍來
不知春至真多少明日東郊探早梅

潞陽公入佐天官兼領翰學賦此送之

分曹猶得坐春風忽領鵷鸞向碧空
三入承明階轉峻兩叅均統寄逾隆
星辰不隔瞻依表桃李爭歸啓事中
青省倘過張樂地莫驚江畔有冥鴻

贈少司徒采山方公得請時公徙止別館未返新
都

成風老手御風姿其那水心聖主知不學賀公稱道士
殊輕白傳愛分司門前羅雀從今日屋裏看山祇舊時
無論賜金多少在君今不飲欲呼誰

操江石中丞母林太淑人壽言

三月十六設帨辰六十六迴無限春青天共指猶圓魄
紫誥仍輝見在身開府夾江文武吏稱觴八座太夫人
騰道金陵好風物那能不遣鬢毛髯

杜翁少時葬親夜歸大雪幾殆若有神人送之得

免文太史圖之矣而又屬蜀人毛太史詩之久
失復得諸賢異其事倚韻和贈成卷余亦嗣焉
死孝仍拚攀栢身生還剛及啓關辰雪深踪跡唯狐兔
夜久扶携有鬼神萬里壁完詩不偶百年珠隕畫如真
莫言弧矢男兒志惆悵誰為掃墓人

陳玉叔廷尉邀大宗伯王公過飲有作

總為襟期不待招坐深清醕緩春宵空庭月送三山色
古樹風為九曲潮我自越音歸轉切君先郢調欲誰驕

唯應醉裏王恭去鶴氅寬閒度七橋

為王學士題馬鞍山

遙從駢馱出層巒攬轡還應得大觀揭地秦鞭驅作障
飛空穆馭且留鞍駝峯對擁春雲暖熊耳雙懸海色寒
見說史成蒙主錫裝來七寶鳳池看

為王大宗伯題五指參天峯

東南欲盡覺天寬矗立高峯障海瀾掩日修羅雲外掌
摩空銅狄露中盤削成華嶽峯峯出寫出郇公朵朵寒

寄語地靈王學士九重今借指南看

顧太史北上

仙郎青雀度梁溪夾路春花醉不迷此去依然丹禁直
瀕年強半碧山樓南溟氣鼓寧容息北斗名成孰與齊
寄語調羹三宰相可寬田父一扶犁

五言排律

潘景升見訪後即游南雍應試賦此贈之以壯行
色

自讀西征賦時推西晉才忽傳中散駕云自銍中來文
豈淨而淺人仍美且翫九方輕牝牡八尺是龍駉虛左
成均席登歌京兆杯名高鵠鵲觀氣逸鳳凰臺六館崢
嶸重三都次第裁他時結駟過莫遣破蒼苔

題凌氏盟鷗館

自昔衣冠會都非江海情君今讀書處披檻湖波平鷗
鳥時時下條風箇箇輕一羣飛的歷數點立分明忽破
春山翠平添烟水清孤棲如有約一飽便無營愧殺鷁

行地愁聽鳳沼名忘機但來往何必更尋盟

賦得柳條恒撲岸花氣盡薰舟送沈子

春風渾似剪花柳一時齊不獨藏鴉穩兼令去鷁迷三
眠初作絮百和欲成泥旖旎粘輕浪顛狂撲大隄青絲
愁綰折紅袖惜分攜灞岸雲初起薇垣日未西一枝從
主賜全樹借卿栖傑直星為柳含香舌是雞河陽妝面
好京兆黛眉低莫以為郎薄時時戀故溪

送湯給事元衡入朝補舊省

離筵一尊酒還試五時衣白簡名逾重青蒲事漸非湛
驚新露渥聚訝舊星稀莫以天顏瘦應推海宇肥暮雲
人怨別喬木爾翻飛倘及弘之事無魚老釣磯

答興國判張羽王

轉憐張別駕十載二毛侵黃口依人慣青衫戀舊深
嫵隅朝暮饌謝豹短長吟泣玉它年價銜珠此日心漸因
窮刺骨翻作怨知音行止吾天表文章爾陸沉數椽分
孺子一衲老叢林如此蹄涔轍鮓魚亦浪尋

日長至為懸弧之辰夜半起坐偶成

子夜不成眠篝燈對黯然微陽欲動後老我未生前但
喜初長日毋論向暮年悟來仍悄悄收得漸綿綿線任兒
曹益弧從耆宿懸無人識余意香火競喧闐

少司徒胡公蒙恩予告詩以寄情

無辨存臣節扳留見帝仁從它貝錦客不是靈絲臣北
極丹心苦函關紫氣真淚枯緣國士心死作山人欲識
加餐意他年致主身

感事得五言長律三十句時家弟敬美致關中書
為歸計因賦此寄之

大道本何諍凡情空見憎
廟廊稀闕事泉石易為繩
魔總百相嬈佛還三不能
豈予真白壁勞彼任青蠅
會得無身語依然有髮僧
江湖元自濶風浪定來澄
嘿嘿時彈指涼涼對撫膺
尺書傳令弟三益喜良朋
草賦推司馬尊心托季鷹
非關怨搖落業已削飛騰
緩蠟千山屐來依六祖燈
天寧久鍾會爾不愧孫登
日月高難毀乾

坤大可憑鵷鷺從嚇鼠羊角定扶鵬若說函中記寧同
漢五陵

送徐汝旭游太學扶侍宗伯公并訊謝宗伯

南州士問媿北闕帝恩繁稍慰晨昏戀仍聞詩禮尊出
從鱸席授歸向鯉庭論荀令香雖冷何郎粉尚溫通家
余獲落喬木爾飛翻獲保野人業能忘真宰恩風飈倏
以過桃李竟何言唯有青山色依然傍華門

尚進士請告扶侍者十五年渡江見訪索詩為贈

世人欣捧檄而汝獨陳情問寢春朝美披襟游思生客
愁過夏緩詩句渡江清指點婁侯國徘徊亞子城父為
此州伯君父仰山按吳有聲兒結五湖盟不作嬰婚嫁君家尚子
平

前揮使王君化六十壽言

少年曾任俠未老便抽身撫劍思前事登壇屬後人樹
同司馬大瓜救故侯貧磊塊聊全酒逍遙且任真圍棋
閒訪謝擊缶或歌秦聞說稱觴地瓊花刺眼新

君之子分閭維

揚近迎君
為壽故云

壽余德甫七十

屈指燕中社俄然爾七旬
五言欺大歷隻字逼先秦
拙猶循吏名逃是逸民長
措翫世眼誰證到頭身珠
玉堪娛老金緋不救貧甘
從絳縣食懶作豫章賓雙
躡匡廬屐孤垂彭蠡綸雲
鴻同意態海鶴鬪精神綵
筆天教健清尊道並醇無
由尋縮地相與結朱陳

癸未除夜

憶昨逢除夜篝燈對苦吟縱無兒女態猶劇歲時心恬
憺吾慚我蹉跎日至今衰顏不解事狂態覓知音有鐵
皆成錯無絃始是琴明年是明日百慮莫相侵

輓皇甫子循先生

威明頻解綬玄晏少歸田人識書淫疾天私黨錮年浮
名日者傳樂事雪兒絃尚作非熊夢俄成賦鵬篇遺文
六季盡新語衆人傳罷理登山屐誰償賣賦錢因君問
班管不朽立言偏

題故孟光祿怡老園

昔在先皇日吾猶識孟嘉清朝倦黃閣黃髮岸烏紗疏
傳金雖少香山社可誇比鄰共雞黍近水足魚蝦汝逐
華胥夢人呼畏壘家霜餘大令摘暑憶故侯瓜往事存
喬木流年問落花不須論代變得老便生涯

元馭閣老將北上要余於野次言別得二章

相印非時授天書特地臨一鰲堪立極萬象想為霖眾
訝商巖夢吾知潁水心戀從烏鳥劇愁向鵲鴒深朝市

安從美山林老亦侵莫教男子淚容易便沾襟

其二

拜命金甌貴徵車竹使專共迎丞相旆還是孝廉船
應象三台外降心一叟前堯天從汝濶佛日傍吾偏
取適難為境貪閒亦礙禪報君從此後隨分太平年

題尤生畫贈林總兵

白雲幕松頂輕風扇茗壚此時羊太傅對客理陰符
且捉玉如意暫疎金僕姑清言寧誤晉雅志在吞吳
海靜

烽堪冷時平將自儒寧知日出處片檄盡輿圖

由陰徑而下至振衣渡又名却女津

夷猶竟韶景窈窕此山阿越女興猶劇夕陰將奈何攀
藤斷纖指躡草澆輕羅石碍蓮雙朵泥沾玉一窩翻然
欲飛渡終是怯凌波

文漪堂之後涼風堂

涼風起蘋末集我鳳凰條小奪琴中理時添酒外驕迴
光汎芍藥遺響逗芭蕉偶爾當三伏欣然至久要老夫

憑仗汝散髮坐逍遙

薄暮練川朱侯過訪小語別去寄贈一章

一雨吐新蛤千村生夏涼傳呼邑侯至能使野人忙
早麥鳩堪噓鄰笏蟻借嘗微言露雄白小坐逼昏黃
有懶酬高誼無求恕老狂今看孺子榻猶帶令君香
車馬初疑夢閭閻未忍忘還同孝宣季朱邑在桐鄉

王愛川先生歸馮翊詩以送之

葉縣君其後談玄早棄官遠公一開社陶令不眉攢為

識黃金界翻憎白玉棺
晨鐘僧粥煖夜唄佛燈寒獅子
現毛孔蓮花生舌端
歸心鴈門市初服鹿皮冠
莫戀粉榆好西方行路難

宿泖塔佛院

莫言初地小但覺四天寬
面面芙蓉鏡層層薜荔冠
一泓鷺眼碧九點鷺頭丹
唄響波聲合漁歌夜色殘
經歸龍藏易僧結蜃樓難
我醉聲聞酒誰施法喜餐
倦分禪榻卧閒借佛書看
猶有微根在羞人喚宰官

再題泖塔因贈修塔住持自正

康會來江表由拳已陸沉五湖三畝地千古一叢林不
壞金剛座長抽碧玉簪火齊搖塔杪齒齒湧波心汝有
誌公錫何勞長者金聚沙緣自昔填海願如今一食分
僧鉢三衣借客衾魚譚放生樂鳥和諷經音小緩廬山
戒籃昇日日尋

壽顧翁七十

少習東魯學詩書執禮身晚膺西漢詔孝弟力田人好

語時依口窮愁不上顰
蘭枝葉已茂蔗境事方新
莫惜如澆酒將分太液津

謝貞吉王孫雅餉

書是豐城劍僧為南浦鱗
直繇深氣誼寧獨慕沈淪
念君饒異物慚余非異人
三絕何能報四愁虛自論
古來無限意奚必在比隣

壽曹茂來進士七十以故人仲蔚子請也

尚憶公車日君方冠弱辰
才真如太傅老不慕平津
第

讀養生主何論觀國賓鷗閒知易飽鶴瘦不關貧閒引
詩娛性毋勞酒養醇芝蘭長自玉竹柏得其真園種樊
侯漆溪收張翰尊猶餘故交子來作掃門人

寄鄧州劉廣文

昔忝襄鄧節于今十四年清才豈我下黃綬屬城偏七
畧元劉向諸生仰鄭虔扶藜過五壠探蠡酌甘泉井自
心源出亭因覽秀傳祇愁花蠟燭不暖青寒氊

弇州續稿卷十九

欽定四庫全書

弇州續稿卷二十

明 王世貞 撰

詩部

五言排律

侍御蘇君按滇中賦得五言八韻送之

高帝何神武
黠編悉內臣
狎聞驄馬使
時祀碧雞神
自爾輶軒發
能開象魏新
坐令驕帥攝
行得悍王馴
斧劃

昆明曙鞭迴棘爨春片言搖地軸尺疏動星辰蠻府音
從革奚囊句盡珍清朝揆地好不必問埋輪

王懷中先生泉人也與余有通家分年七十有七
矣貌壯麗健舉止飲噉兼人既深東越建昌之
學又善語玄素之秘訪余弇中頗傾嚮言事諸
少而刺輦上君子尋飄然遠別得排律八韻贈
之

不必通家刺衣裳為倒顛乍驚顏轉少相對意俱玄貯

腹有千卷問囊無一錢盡驅妻子累翻結宰官緣泣路
支離叟懷人黨錮篇自因長住世那可不憂天甚矣吾
衰矣其然君豈然太湖無限好一曲養殘年

慕椿林翁壽言

六十猶嬰慕栖遲似魯生家傳和靖隱人識孝廉名必
軼齊梁駕還追李杜盟有雛俱五彩合璧並連城綸綍
傳西掖冠裳自上京峯如雙髻黑身似九仙輕小飲收
春樹端居詠太平瑤池萬年實併益壽顏頰

白雀寺秀上人新詩時有開元以前調又能作本
色語出行卷謁余求訂且將北游賦此送之

六朝富僧藻末宋始逃禪及爾操觚日逢余瘞硯年曹
溪一偈後衣鉢幾人傳琢葉妨元氣拈花合自然思超
靈鷲表格逸景龍前莫以文通拙徒成怨別篇

咏江令

江令好為佞佞辭何太工拈來攝山草吹著後庭風佛
日不相照君恩難望終猶輸孔範死虛慨魯侯忠搏頰

咸陽市傷心建業宮南冠無故野應始悟三空

江令詩有三空

豁已悟語

答贈張太學孺愿兼寄示沈嘉則屠長卿孺愿之
先人為大司馬公嘉則長卿俱其客且與孺愿
善序其詩而不能無白首之歎故云

明海張司馬龍門一世師久欽鯨力大不盡鳳毛奇業
稱元方弟名高蔡克兒有才疑夢筆無意僅為箕天向
金陵闢虹從赤董垂諸生俱避席祭酒亦低帷柳態猶

長緒關心祇項斯寄聲屠與沈須憶御膺時

齊王孫仲望邀同周公瑕陸成叔登清涼臺分韻

得風字

絕磴盤天界方臺枕法宮白龍衡劃斬丹鷺遠排空寶
樹青冥底金莖紫氣中曼殊分化跡石跪遜人工嶺似
高低鷺城疑斷續虹一依文佛日四起大王風目極神
從爽心清境自同諸賢今鮑謝能益帝都雄

慰梅禹金試金陵放落一首

昔時梅宛陵歐九並馳稱萬古一詩在青山白髮憎雲
孫更蹭蹬雪曲有飛騰桃葉雙頭檝芙蓉半臂綾此時
吳女隊讓汝獨先登

送許京兆救故友李中丞左遷

豈淺馮唐對幾同左伯寬一書存友道遷客是君恩襍
被辭京府傾都慟國門江雲自舒卷山色任晴昏剩得
支離叟空為歎曲言賜環須有待弟子莫招魂

故人卓徵甫光祿補官北上過金陵飲官舍賦此

送之且訂留署之約

顛倒欣相命，翻飛不自勝。
詞人武林社，天子太官丞。
醉態傾嵇叔，高標愧李膺。
望迷金掌露，坐瑩玉壺冰。
我自難燕市，君應乞秣陵。
莫嫌留署冷，官酒尚如澠。

訪明徵君事讀唐高御碑有感

徵君不可跡，蘿薜望來深。
更藉空王力，高明傳至今。
蒲輪三起詔，螭首一綸青。
雖表旌賢媿，終非遜世心。
欲伸頻止薦，念爾不余歆。

朱定國失意後訪我金陵賦此贈之

十年真畏友片語足兒師訪我金陵夕猶銜壁刖悲三
山橫秀色六代吐雄詞是處堪携酒何妨且咏詩綢繆
追往事飛動卜前期海錯携來富猶堪住少時

朱虞封先為賢令入郎考功冰蘖之操皎然人口

出視江右學政於其行賦此志別

卓爾松筠操皎然冰玉姿已標循吏冠復作儒林師左
蠡揚瀾日豐城辨斗時青衿歸水鑑絳帳吐風儀鷺渚

飛揚旆雞山黯澹庖老夫貪一壑後會恐無期

觀潮夢許作

七月十八日潮頭何壯哉平驅銀海忽捲雪山來洶洶
噴晴雪殷殷動遠雷千艘催簸蕩萬弩屈喧唳笑緩枚
生發爭先伍相才老人驚未覩尊酒喜重開飛瀑廬山
破奔流砥柱推乾坤此三絕欲返重徘徊

過陸震卿大行讀書處有贈

過君讀書處破壁侵菰蘆不厭饑時麥難挑旱後蔬沈

淪詩更好飛動意能無莫以鷗冠聚尤深魚服虞時清
寧任俠宦薄且為儒但使星文就君王自按圖

顧仲韓携酒船相送傾倒尤深因贈仲韓併及張
長興朱氏三子

綠水搖晴旭滄洲動午烟誰携若下酒來喚子猷船脣

玉玄談嫩披沙麗句圓書探龍爪秘畫得虎頭傳泥飲

推三雅

朱氏三兄弟
飲量最洪

風流數七賢

與坐者
七人

老夫從襪解

不待長君前

謂長
與也

贈陸成叔山人新居

薄俗人難傍窮居地自偏何妨號城市亦自飽雲烟
坐青山滿沿階綠樹圓饌饒三九菜酒靳十千錢駐戶
桓生馬裁詩薛氏箋仍誇有奇績校得子虛篇

送方伯吳公入覲還金陵却赴浙省

何限朝天艦如公五兩輕君王書上考宴餞下承明不
愛東膠賞俱稱召伯榮三提長官印十稔臨安城草木
沾恩澤江山識姓名官如雨高峻人比孤山清休汝冠

裳會留恂父老情，畫熊猶緩發竹馬。已先迎久偃扶桑，
颺仍留下瀨兵。佇看新節鉞，隱隱出西京。

開府報缺新
命旦夕下矣

七言排律

避暑園居得長律二十句

今年毒熱異常年，似為吾園稍見蠲。謝客琴樽寬約束，
親人魚鳥恣留連。已多苔色侵衣上，時有松聲到枕邊。
鑿就雙溪長貯月，疊成三島別藏天。鶯花得所朝偏麗，
鰕菜趨時晚更鮮。中散酒鎗盛沆瀣，右軍書筆走雲烟。

絃中白雪非江左篋裏青山是輞川大雅詩歌篇十九
古文金石卷三千乍談颺爾涼颺至小坐翛然大火捐
見說長安饒炙手可容分借北窻眠

吾州有王三翁者沙人也年一百六常住明上人
燕人也年一百四今秋眉州劉大瓢來訪自言
歷三丁丑年百二十一度其狀貌亦似百許歲
人期以閏月之十二日會吾山園喜而有賦

三者三百三十歲一農一道一山僧俱稱獻壽來南極

直數生年到裕陵長就鶴形驕婉姱煉成松骨鬬峻嶒
囊餘伏翼千秋餌手拄胡孫萬歲藤迤邐降庭猶恨少
依稀杖國嚮來曾他年太學應親割今日清尊暫作朋
疏上壺關名是茂篇留陌上姓為應懸知太史占星象
廁我嘉弧恐未能

詩成之明日而王翁疾甚又明日就木矣感歎之
餘復得一章

一百六年難老身半剎那間隔世塵飛去獨為華表鶴

化來雙剝禹門鱗空教休連歌三隻贏得商於僅二人

海為桑田垂沮洳峯如華頂斷嶙峋

華嶽三峯

虎溪他日不

成笑橘叟茲秋聊對論彭祖較來差尚天黔婁謚後未
為貧客從逝水浮雲去交許清風明月新更道歲寒還
有托老梅拳曲伴松筠

大宗伯吳興董公枉棹海濱道返命進士長君代

訪且贈長律飾獎過情愧感之情托之申和

元老三朝髯未蒼碧瀾天日供文章初將息念歸祗樹

雅有高名在栢梁冀北羣羣空騷裊淮南字字挾風霜
書成舊錫黃銀印夢醒猶疑白玉堂善誨門墻多未照
憐才齒頰有餘香齊紈忽展銀鈎贈越錦難輕玉案償
共道賢良惟一董可能京兆擬三王
公以余補留京
有三王之擬 芄
芄蘭桂秋逾茂藹藹桑榆日未央丹穴鳳毛開氣色清
時旅筆借飛揚莫言興盡山陰舫衣帶居然一水鄉

杜清甫丈九十矣而矍鑠如少年曾憶白香山贈
裴淄州云九十不衰真地仙因倚起語壽之

九十不衰真地仙姓名無忝杜延年圍棋縱負人人豈
賣藥能寬處處田春煖絃歌秦女巷午晴詩畫米家船
携來鳩杖那防噎贈得羊裘不肯穿自剔殘燈書小令
旋烹新茗結清緣惟應薊子摩銅狄見爾垂髫學數錢
再用香山居士起語壽駱廣州先生

九十不衰真地仙五朝清晏即人天難逢拜老中興日
憶得懸弧孝廟年薄宦陸生無粵橐歸心賀監有湖田
鄉吟捉鼻從清濁社酒膠脣且聖賢大笑武公箴自苦

長誇榮啓樂仍偏如傳籃筍來蓮社應許門人任一肩
壽封給事蠡湖顧翁八十

江左宗盟陸凱前中興風雅賀循聯生兒舉貴同元歎
取婦篇多似彥先省覲主恩深愛日賜租封事上迴天
俱誇小鳳銜書地

唐掖垣從
官名小鳳

才是非熊入夢年銀鑿法

傳中禁美綵衣春奪五時鮮彭湖斗野分雄劍亞字城
陂汎酒船間出膏車新郭里有時耕耒太湖田浮名不
愛真天隱樂事長寬即地仙

觀察顧公六十壽言

三朝舊德剡方騰四姓高門代並稱人向隱君誇晚節
我於循吏表中興無書新沓交從在有子藍田價轉增
賜覲宮花分露掌傳家諫草挹風稜庭間鯉對詩能續
海近籌添事可憑興到玉峯舒蠟屐思幽金澤傍漁燈
徵車斷不驚元歎推轂虛曾忝茂弘更祝朋尊須盡量
莫教春酒但如澆

寄題吳明卿叅政北園

使君天許卧林丘，背郭園成事事幽。
檻外星辰依北極，坐中冰玉盡南州。
族雲晦藹三春變，平楚蒼茫一鑑收。
乞得隣花添爛漫，偶來山鳥獻鈎輈。
恠他妨醉平泉石，便我尋芳杜若洲。
機事摠忘難抱甕，生涯雖小學垂鈎。
却山地貴誇編埒，玄武陂寬好競舟。
俱取北意爭以儂家五畝野，白公池館讓風流。

送吳晉陵趙常熟二太史賜環入朝

詞林矯矯並人倫，抗疏那妨丞相嗔。
圻地黃河雙砥柱，

迴天白日一金輪片言色借宸楓重萬姓聲傳諫草新
擬奪惠文冠太史却將巾幗贈何人耦耕沮溺身堪老
三逕求羊跡共淪主聖親題罪已詔時清須愛致君身
銀魚法錦聯翩復白虎名經次第陳豈以登仙誇去艤
母從遯叟問知津折餘虞仲祠前柳採自延陵宅畔蘋
兩地由來有廉讓可應徒作引裾臣

金白嶼先生壽九十矣其文彩風流比之前九十
者杜翁駱師則尤翩翩焉不佞仍用白香山起

句例壽之得六韻

九十不衰真地仙
長干樂事況年年
生當五帝舒長日
老結三山綺麗緣
無意授書天子問
有時裁句雪兒傳
賜來鳩杖何妨噎
停著柴車不待延
稚子競誇婪尾酒
故人分得賣文錢
共云蔗境從容咀
莫放滄溟便作田
閱史偶有所感

掩卷柴門數落暉
古來俱羨聖之威
那知天地長多事
揔為英雄未息機
衣赭詎容人氣在
簪銀還見女龜歸

鮑魚不救祖龍臭螻螳翻因齊霸肥黃屋事移輸白屋
袞衣緣盡著青衣王孫子姓時時改寒食園陵箇箇饑
塵世隙駒俄自了豎儒毫鬼易成非江南鹿豕同游處
喬木連雲盡百圍

輓故贈太子少保潘恭定公時年八十有七

甲子前頭對大廷耗磨同輩盡凋零官從密印加三少
帝與禎符靳九齡誰並五朝論出處時因八座愴儀刑
生驕尚父猶宣髮煉得嬰兒任解形丹竈乍閒龍虎衛

赤霄疑駕鳳凰輶者英會裏無春雪箕尾行邊有歲星
兩字易名華勝袞千秋遺草汗長青即看顛履嫖姚冢
况復芝蘭謝傳庭

世貞邇來壽九十翁如駱司理杜金二處士皆由
白香山起語今年為宗履湖先生九十復引前
例壽之先生之伯子故吏部子相余碩交也故
中聯多及之

九十不衰真地仙白公社裏冠羣賢強逾歷下書堪受

隱傍淮南法易傳渤海尚誇銷劍地蜀都猶憶夢刀年
名山自滿宗家壁北斗還高吏部編早闕梁松牀下拜
叨陪畢卓甕頭眠欲將鳩杖為公壽緩步當車已綽然

三月三日屋後桃花下與兒子小酌紅酒因憶昨
歲從吳明卿諸楚人於弇園楔飲遂成一排律

去歲三月復三日忽逢楚狂為楚歌即無草聖愧逸少
雅有蘭亭如永和故知故事不可再避人避地將誰過
家西一灣小曲水屋後半榻貧維摩偶然兒子致紅友

聊為桃花飛白波盤餐第輸狗杞美鼓吹其奈鳶第多
執事虞小儒不解事無可被除如我何

緹帥左都督麻城劉公貽書慰存且有名香佳扇
之貺七言排律二十四句志謝

春明祖道近黃昏悵別殷勤款款言十載鹿門余偃息
九霄羊角爾騰騫藉令東第通侯貴誰似南衙太尉尊
直有詩書繩祖武長將肝胆答君恩朝霞剪賜宮袍麗
冬日聆傳聖語溫競病句誇曹左衛衣冠禍解竇城門

三台不隔江湖夢一壑翻勞霄漢論地遠孤盧難物色
天空鴻鴈有音存扇從巴蜀能蠲暑香自西戎解返魂
稍覺枯魚貪涸轍居然病鶴怕乘軒為珪為鼠同稱璞
如蟻如山揔字鯤公輩長年扶日月老夫餘息任乾坤

賀族孫都運汝康八十

樨紫衫圍腰帶黃茜朱顏奪鬚毛蒼庚桑壘置通三紀
甲子輪週又廿霜四海宦游垂欲盡五湖襟度雅相
當人誇渭水非熊卜家有緱山馭鶴方庭樹似從峯玉

徙節莫真共海籌長竹林醉阮年猶少對爾慚稱大父
行

昔白文公有詩贈裴淄州其起句云九十不衰真
地仙余以此例贈九十翁者凡五人矣莆田林
方渠公以名進士官至郡守累進階正三品今
年壽九十二而其子敬夫復以雷陽守便道綵
侍母論五人者僅一宗馬湖鴈行即所謂裴淄
州者當亦不及也喜羨之餘敬步前韻授之俾歌

以稱觴

九十不衰真地仙
阿誰諸福似君全
生兒自授詩三百
請祿同登石二千
舊憇棠陰青蔽畝
親栽槐色翠摩天
壺公山靜堪斟酒
延壽陂清好放船
尚父少慚多偃蹇
啟期衰覺轉顛連
林家故是寬喬水
行看雙標紀大年

閩省有百歲坊
亦太守亦林也

余與竹溪王大中丞為郢中之別餘十二年矣公
撫關右值旱魃為虐公竭力祛之民漸回菜色

辱遣使問存恤然有懷遂成一律時閏六月之望也

十年郢里追陪後百二秦關保障中分陝古時惟召伯
三城今日有張公雲霓疏自憂天切鴻鴈詩偏憫旱工
豈為土龍方致雨將無銅雀解鳴風即丘東海俱名族
建業長安總舊宮無那新秋圓月色一尊西笑向誰同
五言絕句

題金陵景送康永錫一絕

莫催桃葉艇去沉秦淮色有興展此圖一掛高齋壁

文休

承畫此景送客金陵題者十二人皆詞翰名家也今輒以贈永錫仍為寫一詩右方

半峯亭

不愛天上游不愛人間住愛此半峯間卧看雲來去

清暉軒

微風卷帷起面面延清暉無生一話後日晏不成歸

碧玉沼

一片荆山玉琢成秋月圓風波落葉盡下有蔚藍天

觀音巖

洗髻碧流潤遶龕紅葉深松風定中過不是海潮音

白龍洞

春雷地底發匹練空中飛母勞久行雨解旱便應歸

多景巖

千巖薦奇色使我勞清瞬其若老僧何不見亦無盡

寶雲井

片片勝鬘雲墜入功德井山僧解夏還和雲煮新茗

偃蓋松

青松作偃蓋相與談禪理
折取松下枝與師充麈尾

鐵塔

當時鐵輪王建此七寶樹
風送黑雲歸巖棲不知處

妙高峰

金山妙高臺飛到峯頭住
逢師卓錫聲不敢復飛去

東齋

月出東林端不照東齋屋
趺坐看西山千巖散金粟

西隱

一瓢挂一錫母勞問姓名欲識西來意崖前栢子生

書于鳧先扇一以自嘲一以自勉

姓字真如蠟墮君牙吻中從容一咀罷方識慕時空

其二

積草池頭夜珊瑚紅欲然只知驚寶色鐵網更何年

梁內史奉詔為譚司馬治墓便道歸省訪余弇園

得三絕贈之

罷輟螭頭直行封馬鬣
阡君看大司馬應否象祈連

其二

白髮閒休倚紅顏
且下機里中爭詫說內史錦衣歸

其三

弇園五載內重見二難過
不獨金蘭合還憐玉樹多

題尊生齋贈張仲慧

古人既已無後人
猶未有欲識生者尊古人落吾口

其二

試問張仲蔚蓬蒿空滿園嚴霜一夜至方悟喬松尊

其三

羣動各相役而我獨無言生當貯萬古那得不為尊

其四

道言有身患佛說無生樂問生何以尊為汝解其縛

王汝止先生過訪弇園有述

塵尾豎新義字字天機流其柰溪邊石頑愚不點頭

其二

春至百卉萌日出萬象麗不應拈破時別自一天地

其三

日斜一局罷觀者謂機深偶爾見敵手由來無勝心

其四

呼尊小酌罷坐愛松風吹忽爾農歌發欣然與點時

其五

藤石從雲老苔階過雨斑游人不解看應道是真山

其六

欲求無識師為我識綺語三界無處尋久墮泥犁土

陳翁六十于鳧先請詩壽之得一絕句

宣髮貌如童藏書比素封何須二千石有子是元龍

題畫

商船一入淮便問淮陰社買酒新城中來醉舊城下

其二

甃社湖頭暝維梢酒一杯不知初月上疑是蚌珠來

其三

二十四橋月醉踏未成半終夜歌吹喧誰傳廣陵散

其四

喚船揚子渡來往無一刻勝作天塹時乾坤限南北

其五

茅君挾二弟去騎三白鵠良常西南垂可能借人宿

其六

下為范公祠上為萬笏林空瞻范公笏不曉范公心

其七

拔地一千尺割城三百畝中有萬玉山此腹知不負

其八

載酒垂虹橋鼓吹乘暝發瞥見金波流七十二殘月

其九

岳王墳畔松枝枝盡南向無那臨臯亭國書偏北上

其十

栖霞佛堂頂流水僧寮下為戀清梵音跳珠不成寫

南昌饒生善醫余友王茂才有隱疾能起之索二

絕句一韻以贈

探囊得秘藥投杖已沈痾試語天帝標論功應孰多

其二

博得羣珠贈王郎起卧痾如逢魏侯疾轉見賜車多

嘉則長卿復以五言絕句二十首博和有如樂府
者有如詠史者漫為倚答當更許我事不許我
情也仰山師云神道則不無佛法須還老夫在
一笑

避雨陵

昔聞六龍駕蜿蜒二陵間至今風雨後清蹕滿空山

穆天子

八駿長在驅生嫌八荒小百辟長在服生憂百年少

韓重答紫玉

主是天上人却為人間死生不結同心空令水連理

細腰宮

楚舞雖自佳楚腰太無力君王幸一顧賤妾忘朝食

高漸離筑

縱令無目生不如有心死惜哉高氏筑仍作荆卿匕

五大夫松

偶爾被秦官何榮亦何辱萬古徂徠雲依然衛其足

鴻門玉斗

此時亞夫心分與玉俱碎却恨入關初不為完璧計

江臯解珮

人去珮亦去珮空人自空情知不嫵婉猶道有無中

九微燈

艷艷九微燈流光鑠瑤席忽報阿環來芙蓉別成色

李夫人

條來仍條往亦知事非的其奈爾兄云佳人難再得

望鄉臺

少卿望鄉臺築城鄉不見賴是不見鄉見來腸寸斷

相如滌器

日醉臨邛市不題臨邛壁怯他賣酒人胸中五雲色

青塚

明妃死時身一帝兩單于不知塚頭草為誰長不枯

爨下琴

自脫厨中爨殘軀擬報恩如何山水調翻向董侯門

白門柳

仲冬白門柳維舟露梢影日暮鳥不栖天空踏枝冷

鄭櫻桃

自嘗鄭櫻桃百果不掛齒生憎冠覓兒眼中復有耳

習家池

從他金兒鏊不博白接離季龍渡洛水奪汝習家池

玉鏡臺

老奴玉鏡臺安儂七寶鏡奴自當奴心儂自憐儂命

解語花

比妾解語花恁笑問東風即令花解語難道得如儂

梁公賭裘

殿前集翠裘褫奴與奴著殿上武媚娘呼誰共誰博

戲贈朱生

小吏黃衣是雄譚白馬非何如學方朔割肉訴諧歸

其二

暑候平原侯跳丸方小說頃刻數千言斜陽尚林樾

訪吳登不值承見寄三絕句賦此為答

從此步履過吳均莫相避試看白板扉的應無鳳字

其二

蹈海惜珠沈歸來偶溪漲忽見明月光居然開老蚌

其三

春來花鳥意父子各爭新但啓柴門看人間大有人

石丈拱辰抱西河之戚今聞後房有旦夕就館者

寄此祝之

忠義鄉中曉充閭佳氣新抱來應有誌天上石麒麟

其二

多生父子緣一念恩情重為是顧非熊還應入熊夢

其三

庭前一枝玉庭表五色雲莫輕襁中兒它年萬石君

其四

去却掌中珠還從蚌中覓合浦作漳流精光夜如日

入秋無事案頭偶有紙筆隨意輒書如風掃華不
倫不理故曰雜題

事在名教中理在名教外事理兩無涉於中得自在
其二

上智與狂愚俱能奪造化唯有中根人隨緣作榮謝

其三

東林咫尺地陶然四方樂却笑柴桑翁斷酒有何惡

其四

阿難縱強記何如周利槃伽陀無一句調息入泥丸

其五

快如久繫人忽遘獨角赦不作謝臨川矯首白蓮社

其六

一把茅蓋頭兩盂陳脫粟笑殺頂生王到了不知足

其七

使我自識我何能遽如此我為知己生古為知己死

其八

阿母偶一來羅刹長伴汝何意晚對人神仙皆妄語

其九

千金蓄稚鼎萬金買良藥未必懸鵲子翻戀人間樂

其十

劍客學神仙十年不敢試除却小有天能無不平事

其十一

西有華胥國北有拘廬州那堪此中住耐可少時游

其十二

十三十八月清光濯毛髮真境苟不虧從人指圓缺

其十三

秋聲不解愁偶叶愁人意任使將愁來無愁與相會

其十四

黃鵠母愛飽那怕人間網不誇羽翼長但誇天地廣

其十五

大毀彌天來今生夙生事差勝買虛名尸居長抱愧

其十六

人生貴六尺借汝成不朽煉得身外身此身亦芻狗

其十七

鐵色閻摩門乃入曇謨最所以阿蘭那空生獨三昧

其十八

百幻葛孝先猶云拙用身我但皮膚盡湛然唯一真

其十九

學士愛栽花花開笑老我何如郭四朝良常種五果

其二十

中黃戀世樂西域勞仙職快哉呂子華方臺寄幽跡

呂公

不居人間又不願造位故云

其二十一

天門無限好却莫忘人間度了衆生後丹元才放閒

其二十二

火棗侑神梨金漿調玉醴但與許道士不與許長史

其二十三

昔有郭崇子譽讐愧讐死德報固寬身直斯可以已

其二十四

調達丈五身却火燒不息一生無所為與佛作功德

其二十五

趙州栢樹子強半嫌人死脫得葛藤纏走入薤薤裏

其二十六

宗門伎倆盡支離作曹洞何似無心人棒喝兩不用

其二十七

達磨三遇毒夫豈流支意大道寧有町並行不相悖

其二十八


雖云却五辛段食猶自寬要和禪悅味不在歡喜丸

其二十九

縱無香積飯不愛重思稻天漿但入唇人生何用飽

其三十

出家夙世緣拋官丈夫事合眼四十年裁能識吾弟



弇州續稿卷二十